

Patakatifu pa Mbinguni,

Tunaye kubani mkuu wa namna hii, aliyeketi mkono wa kuume wa kiti cha enzi cha Ukuu mbinguni, mbudumu wa patakatifu, na wa ile hema ya kweli, ambayo Bwana aliweka wala si mwanadamu. Waebrania 8:1, 2.

Somo la patakatifu na hukumu ya upelelezi linapasa lieleweke kikamilifu kwa watu wa Mungu. Wote wanahitaji kujua wenyewe mahali na kazi ya Kuhani wao Mkuu. Vinginevyo haitawezekana kwao kufanyia mazoezi imani ambayo ni ya muhimu kwa wakati huu au kujaza nafasi ambayo Mungu amepanga waijaze. Kila mtu ana roho ya kuokoa au kupoteza. Kila mtu ana kesi inayomngoja katika mahakama ya Mungu. Kila mmoja inampasa kukutana na Jaji Mkuu uso kwa uso.

Patakatifu pa mbinguni ndiyo kituo hasa cha kazi ya Kristo kwa ajili ya wanadamu. Panaihusu kila nafsi inayoishi duniani. Panafunua mpango wa ukombozi, pakituleta karibu kabisa na mwisho wa wakati na pakifunua suala la ushindi wa pambano kati ya haki na dhambi. Ni suala muhimu sana kuwa wote wajifunze masomo haya na waweze kumjibu kila mtu awaulizaye sababu ya tumaini lililoko ndani yao.

Maombezi ya Kristo kwa ajili ya mwanadamu ndani ya patakatifu pa mbinguni ni muhimu sana kwa ajili ya mpango wa wokovu kama kifo Chake msalabani kilivyo muhimu. Kwa kifo Chake alianza kazi ile ambayo baada ya ufufuo Wake alipaa mbinguni kwenda kuimalizia. Inatupasa kwa imani kuingia ndani ya pazia, "alimoingia Yesu kwa ajili yetu, mtangulizi wetu" (Waebrania 6:20). Mle nuru kutoka kwenye msalaba wa Kalivari inaakisiwa. Mle tunaweza kupata uelewa wa wazi zaidi kuhusu siri za ukombozi. Wokovu wa mwanadamu unatekelezwa kwa gharama isiyokuwa na kikomo ya mbinguni; kafara iliyotolewa inalingana na madai mapana ya sheria ya Mungu iliyovunjwa. Yesu amefungua njia ya kwenda kwenye kiti cha enzi cha Baba na kwa njia ya upatanisho Wake, shauku ya dhati ya wote wanaokwenda Kwake kwa imani inaweza kuwasilishwa kwa Mungu.

"Afichaye dhambi zake hatafanikiwa; Bali yeye aziungamaye na kuziacha atapata rehema" (Mithali 28:13). Ikiwa wale wanaoficha na kutoa udhuru kwa ajili ya makosa yao wangeona jinsi Shetani anavyofurahia kwa ajili yao, jinsi anavyomsuta Kristo na malaika watakatifu kwa sababu ya ufichaji na udhuru wao huo, wangeharakisha kuungama dhambi zao na kuziacha. Kwa njia ya dosari katika tabia zao, Shetani anatenda kazi ya kutawala akili yote na anajua kuwa ikiwa dosari hizi zitaendelea kuwepo, atafaulu. Kwa hiyo anatafuta daima kuwadanganya wafuasi wa Kristo kwa hila zake mbaya kwamba haiwezekani kwao kushinda. Lakini Yesu anasihi kwa ajili yao kwa njia ya mikono Yake iliyojeruhiwa, mwili Wake uliochubuliwa... Asiwepo mtu anayechukulia kuwa dosari zake hazitibiki. Mungu atatoa imani na neema ili kuzishinda. (Pambano Kuu uk. 403, 404)